

八

編

類

纂

八編類纂卷之二百七十
稗編

文類

論詩賦

西漢之賦其辭工於楚騷、東漢之賦其又工於西漢、
以至三國六朝之賦一代工於一代辭愈工則情愈
短而味愈淺味愈淺則體愈下建安七子獨王仲宣
辭賦有古風至晉陸士衡輩文賦等作已用俳體流
至潘岳首尾絕俳迨沈休文等出四聲入病起而俳
體又入於律矣徐庾繼出又復隔句對聯以爲駢四

八
儷六簇事對偶以爲博物洽聞有辭無情義亡體失
此六朝之賦所以益遠於古然其中有安仁秋興明
遠舞鶴等篇雖曰其辭不過後代之辭乃若其情則
猶得古詩之餘情矣

爲古賦者率以徐庾爲宗亦不過少異於律爾甚而
或以五七言之詩四六句之聯以爲古賦者中唐李
太白天才英卓所作古賦差強人意但俳之蔓雖除
而律之根故在雖下筆有光醖時作奇語然只是六
朝賦爾惟韓柳諸古賦一以騷爲宗而超出俳律之
外唐賦之古莫古於此至杜牧之阿房宮賦古今膾

炙但太是論體不復可專目爲賦矣母亦惡俳律之
過而特尚理以矯之乎吁先正有云文章先體製而
後文辭學賦者其致思焉

高祖時叔孫通制宗廟樂迎神奏嘉至入廟奏永至
乾豆上奏登歌再終下奏休成天子就酒東箱坐定
奏永安然徒有其名而亡其辭所載不過武帝郊祀
十九章而已後儒遂以樂府之名起於武帝殊不知
孝惠二年已命夏侯寬爲樂府令豈武帝始爲新聲
不用舊辭也迨東漢明帝遂分樂爲四品一曰天子
樂郊廟上陵用之二曰雅頌樂辟雍享射用之三曰

黃門鼓吹樂天子宴羣臣用之四曰短簫鐃歌樂軍
中用之其說雖載方冊而其制亦復不傳魏晉以降
世變日下所作樂歌率皆夸靡虛誕無復先王之意
下至陳隋則淫哇鄙褻舉無足觀矣

晦庵先生嘗答輩仲至有曰古今詩凡三變自漢魏
以上爲一等自晉宋間顏謝以後下及唐朝爲一等
自沈宋以後定著律詩下及今日又爲一等然自唐
初以前爲詩者固有高下而法猶未變至律詩出而
後詩之與法始皆大變無復古人之風矣嘗欲抄取
經史韻語下及文選漢魏古詞以盡郭景純陶淵明

之作、自爲一編、而附三百篇楚辭之後、以爲詩之根本準則、又於其下二等之中、擇其近於古者、各爲一編、以爲羽翼與衛、其不合者則悉去之、不使接於耳目、入於胷次、要使方寸之中、無一字世俗言語意思、則其爲詩不期於高遠而自高遠矣、

五言古詩載于昭明文選者、唯漢魏爲盛、若蘇李之天成、曹劉之自得、固爲一時之冠、究其所自、則皆宗乎國風與楚人之辭者也、至晉陸士衡兄弟、潘安仁、張茂先、左太冲、郭景純輩、前後繼出、然皆不出曹劉之軌轍、獨陶靖節、高風逸韻、直超建安而上之、元嘉

以後三謝顏鮑又爲之冠其餘則傷鏤刻遂乏渾厚之氣永明而下抑又甚焉沈休文旣拘聲韻江文通又過模擬而詩之變極矣唐初承陳隋之弊唯陳伯玉厚師漢魏以及淵明復古之功於是爲大迫開元中有杜子美之才瞻學優兼盡衆體李太白之格調放逸變化莫羈繼此則有韋應物柳子厚發穠纖於簡古寄至味於澹泊自是而後律詩日盛而古學日衰宋初崇尚晚唐之習歐陽永叔痛矯西崑陋體而變之並時而起若王介甫蘇子美梅聖俞蘇子瞻黃山谷之屬非無可觀然皆以議論爲主而六義益晦

矣。馴至南渡遞相循襲，不離故武，獨攷亭朱子以豪傑之材，上繼聖賢之學，文辭雖其餘事，然五言古體實宗風雅而出入漢魏陶韋之間。

世傳七言起於漢武，栢梁臺體按古文苑云：元封三年，詔群臣能七言詩者上臺侍坐。武帝賦首句曰：日月星辰和四時。梁王襄繼之曰：驂駕四馬從梁來。叶自襄而下作者二十四人，至東方朔而止。每人一句，句皆有韻，通二十五句，共出一韻，蓋如後人聯句而無隻句與不對偶。後梁昭明輯文選，東漢張衡四愁詩四首，每首七句，前三句一韻，後四句一韻，此則

後人換韻體也。古樂府有七言古辭。曹子建輩擬作者多馴至唐世作者。目盛然有歌行有古詩。歌行則放情長言。古詩則循守法度。故其句語格調亦不能同也。大抵七言古詩貴乎句語渾融。格調蒼古。若或窮鏤刻以爲巧。務喝喊以爲豪。或流乎萎弱。或過乎纖麗。則失之矣。

昔人論歌辭有有聲有辭者。若郊廟樂章及饒歌等曲是也。有有辭無聲者。若後人之所述作。未必盡被於金石也。夫自周衰採詩之官廢。漢魏之世歌詠雜興。故本其命篇之義曰。篇因其立辭之意曰。辭體如。

行書曰行述事本末曰引悲如蛩蛩曰吟委曲盡情
曰曲放情長言曰歌通俚俗曰謠感而發言曰歎憤
而不怒曰怨雖其立名弗同然皆六義之餘也唐世
詩人共推李杜太白則多模擬古題少陵則卽事名
篇無復倚傍厥後元微之以後人沿襲古題倡和重
複深以少陵爲是

文章辨體
論七條

詞賦

堯舜之時、變得之以和人神、舞百獸、三代春秋之際、
師襄師曠、州鳩之徒、得之爲樂官、理國家、知興亡、周
衰官失、樂器淪亡、散之河海、逾千百歲間、未聞有得

變者其天地人之和氣相接者既不得泄於金石疑其遂獨鍾於人故其人之得者雖不可和於樂尚能歌之爲詩古者登歌清廟大師掌之而諸侯之國亦各有詩以道其風土性情至於投壺饗射必使工歌以達其意而爲賓樂蓋詩者樂之苗裔與漢之蘇李魏之曹劉得其正始宋齊而下得其淳淫流佚唐之時陳子昂李杜沈宋王維之徒或得其浮古淡泊之聲或得其舒和高暢之節而孟郊賈島之徒又得其悲愁鬱埋之氣由是而下得者時有而不純焉今聖俞亦得之然其體長於本人情狀風物英華雅正變

態百出、嗟今其似春、凄今其似秋、使人讀之可以喜、
可以悲、陶暢酣適、不知手足之將鼓舞也、
書榜聖俞
素後

文

佇中區以玄覽、願情志於典墳、遵四時以歎逝、瞻萬
物而思紛、悲落葉於勁秋、喜柔條於芳春、心凜凜以
懷霜、志眇眇而臨雲、詠世德之俊烈、誦先人之清芬、
遊文章之林府、嘉藻麗之彬彬、慨投篇而援筆、聊宣
之乎斯文、其始也、皆收視反聽、耽思傷訊、精鶩八極、
心游萬仞、其致也、情曠曠而彌、鮮物昭晰而互進、傾
羣言之瀝液、漱六藝之芳潤、浮天淵以安流、濯下泉

而潛浸於是沈辭怫悅若游魚銜鉤而出重淵之深
浮藻聯翩若翰鳥纓繳而墜曾雲之峻收百代之關
文採千載之遺韻謝朝華於已披啟夕秀於未振觀
古今於須臾撫四海於一瞬然後選義按部考辭就
班抱景者咸叩懷嚮者必彈或因枝以振葉或沿波
而討源或本隱以末顯或求易而得難或虎變而獸
擾或龍見而鳥瀾或妥帖而易施或岨嶇而不安罄
澄心以凝思眇衆慮而爲言籠天地於形內挫萬物
於筆端始躑躅於燥吻終流離於濡翰理扶質以立
幹文垂條而結繁信情貌之不差故每變而在顏思

熟讀一過
作文之快
顯然

涉樂其必笑、方言哀而以歎、或操觚以率爾、或含毫而遽然、伊茲事之可樂、固聖賢之所欽、課虛無以責有、叩寂寞而求音、函絲邈於尺素、吐滂沛乎寸心、言恢之而彌廣、思按之而愈深、播芳蕤之馥馥、發清條之森森、繁風飛而颺、豎鬱雲起乎翰林、體有萬殊、物無一量、紛紜揮霍、形難爲狀、辭程才以效伎、意司契而爲匠、在有無而儼俛、當淺深而不讓、雖離方而遯圓、期窮形而盡相、故夫誇目者尚奢、慙心者貴、當言窮者無隘、論達者唯曠、詩緣情而綺靡、賦體物而瀏亮、碑披文以相質、誄纏絲而悽愴、銘博約而溫潤、箴

頓挫而清壯、頌優游以彬蔚、論精微而朗暢、奏平徹、以閑雅說煒燁、而譎詭雖區分之在茲、亦禁邪而制放、要辭達而理舉、故無取乎冗長、其爲物也多姿、其爲體也屢遷、其會意也尚巧、其遣言也貴妍、暨音聲之迭代、若五色之相宣、雖逝止之無常、固崎嶇之難便、苟達變而識次、猶開流以納泉、如失機而後會、恒操末以續顛、謬玄黃之秩序、故渙浥而不鮮、或仰偃於先條、或俯侵於後章、或辭害而理比、或言順而義妨、離之則雙美、合之則兩傷、考殿最於錙銖、定去留於毫芒、苟銓衡之所裁、固應繩其必當、或文繁理富、

古今文人
俱犯此病

而意不指適、極無兩致、盡不可益、立片言以居要、乃一篇之警策、雖衆辭之有條、必待茲而効績、亮功多而累寡、故取足而不易、或藻思綺合、清麗芊眠、炳若縵繡、懷若繁絃、必所擬之不殊、乃闇合乎曩篇、雖杼軸於予懷、忭他人之我先、苟傷廉而愆義、亦雖愛而必捐、或若發頴豎、離衆絕致、形不可逐、響難爲係、塊孤立而特峙、非常音之所緯、心牢落而無與偶、意徘徊而不能褻、石韞玉而山暉、水懷珠而川媚、彼榛楛之勿剪、亦蒙榮於集翠、綴下里於白雪、吾亦以濟夫所偉、或託言於短韻、對窮迹而孤興、俯寂寞而無友、

仰寥廓而莫承、譬偏絃之獨張、含清唱而靡應、或寄
辭於瘁音、言徒靡而弗華、混妍蚩而成體、累良質而
爲瑕、象下管之偏疾、故雖應而不和、或遺理以存異、
徒尋虛而逐微、言寡情而鮮愛、辭浮漂而不顧、猶絃
么而徽急、故雖和而不悲、或奔放以諧合、務嘈囋而
妖冶、徒悅目而偶俗、固聲高而曲下、寤防露與桑間、
又雖悲而不雅、或清虛以婉約、每除煩以去濫、闕大
羹之遺味、同朱絃之清汜、雖一唱而三歎、固旣雅而
不豔、若夫豐約之裁、俯仰之形、因宜適變、曲有微情、
或言拙而喻巧、或理樸而辭輕、或襲故而彌新、或沿

濁而更清、或覽之而必察、或研之而後精、譬猶舞者
赴節以投袂、歌者應絃而遣聲、是蓋輪扁所不得言、
故非華說之所能精、晉辭條與文律、良予膺之所服、
練世情之常尤、識前修之所淑、雖濬發於巧心、或受
嗤於拙目、彼瓊敷與玉藻、若中原之有菽、同橐籥之
罔窮、與天地乎並育、雖紛藹於此世、嗟不盈於手掬、
患挈瓶之屢空、病昌言之難屬、故蹉跎於短韻、放庸
音以足曲、恒遺恨以終篇、豈懷盈而自足、懼蒙塵於
叩缶、顧取笑乎鳴玉、若夫應感之會、通塞之紀、來不
可遏、去不可止、藏若景滅、行猶響起、方天機之駿利、

夫何紛而不理。思風發於胸臆。言泉流於唇齒。紛歲
幾以馭選。唯毫素之所擬。文徽徽而溢目。音泠泠而
盈耳。及其六情底滯。志往神留。兀若枯木。豁若涸流。
覽營鬼以探頤。頓精爽而自求。理翳翳而逾伏。思軋
軋其若抽。是故或竭情而多悔。或率意而寡尤。雖茲
物之在我。非余力之所戮。故時撫空懷而自惋。吾未
識夫開塞之所由也。伊茲文之爲用。固衆理之所因。
恢萬里使無閼。通億載而爲津。俯貽則於來葉。仰親
象於古人。濟文武於將墜。宣風聲於不泯。塗無遠而
不彌。理無微而不綸。配霑潤於雲雨。象變化乎鬼神。

被金石而德廣流管絃而日新文賦

今之文人魯國孔融文舉廣陵陳琳孔璋山陽王粲
仲宣北海徐幹偉長陳留阮瑀元瑜汝南應瑒德璉
東平劉楨公幹斯七子者於學無所遺於辭無所假
咸以自騁驥驟於千里仰齊足而並馳以此相服亦
良難矣蓋君子審己以度人故能免於斯累而作論
文王粲長於辭賦徐幹時有齊齊俗文氣舒緩氣然粲之匹
也如蔡之初征登樓槐賦征思幹之玄猿漏卮圓扇
橘賦雖張蔡不過也然於他文未能稱是琳瑀之章
表書記今之雋也應瑒和而不壯劉楨壯而不密孔

融體氣高妙有過人者然不能持論理不勝辭至於雜以嘲戲及其所善楊班儔也常人貴遠賤近向聲背實又患闇於自見謂已爲賢夫文本同而末異蓋奏議宜雅書論宜理銘誄尚實詩賦欲麗此四科不同故能之者偏也唯通才能備其體文以氣爲主氣之清濁有體不可力彊而致譬諸音樂曲度雖均節奏同檢至於引氣不齊巧拙有素雖在父兄不能以移子弟蓋文章經國之大業不朽之盛事年壽有時而盡榮樂止乎其身二者必至之常期未若文章之無窮是以古之作者寄身於翰墨見意於篇籍不假

良史之辭不託飛馳之勢而聲名自傳於後

典論論

方其擗翰氣倍辭前暨乎篇成半折心始何則意翻
空而易奇言微實而難巧也是以意授於思言授於
意密則無際疎則千里若夫駿發之士心總要術敏
在慮前應機立斷單思之人情饒岐路鑒在疑後研
慮方定機敏故造次而成功慮疑故愈久而致績
懇愜者辭爲心使浮侈者情爲事使繁約得正華實

相勝

文心雕龍

文心雕龍云頌頌須鋪張揚厲而以典雅豐縟爲貴敷
寫似賦而不入華侈之區敬慎如銘而異乎規諫之

域諒哉

文章辨體序

凡碑碣表於外者文則稍詳誌銘埋於壙者文則嚴謹其書法則唯書其學行大節小善寸長則皆弗錄其大抵諫則多叙世業故今率倣魏晉以四言爲句哀辭則寓傷悼之情而有長短句及楚體不同焉其

三

生之書辭甚高而其問何下而恭也能如是誰不欲告生以其道道德之歸有日矣况其外之文乎抑愈所請望孔子之門牆而不入于其宮者焉足以知是且非邪雖然不可不爲生言之生所謂立言者是也

漢加文選
卷之四
少

生所爲者與所期者甚似而幾矣抑不知生之志蘄
勝於人而取於人邪將蘄至於古之立言者邪以勝
於人而取於人則固勝於人而可取於人矣將蘄至
於古之立言者則無望其速成無誘於勢利養其根
而埃其實加其膏而希其光根之茂者其實遂膏之
沃者其光曄仁義之人其言藹如也抑又有難者愈
之所爲不自知其至猶未也雖然學之二十餘年矣
始者非三代兩漢之書不敢觀非聖人之志不敢存
處若忘行若遺儼乎其若思茫乎其若迷當其取於
心而注於手也惟陳言之務去憂憂乎其難哉其觀

於人不知其非笑之爲非笑也如是者亦有年猶不改然後識古書之正僞與雖正而不至焉者昭昭然自黑分矣而務去之乃徐有得也當其取於心而注於手也汨汨然來矣其觀於人也笑之則爲喜譽之則以爲憂以其猶有人之說者存也如是者亦有年然後浩乎其沛然矣吾又懼其雜也迎而距之乎心而察之其皆醇也然後肆焉雖然不可以人養也行

之乎仁義之途游之乎詩書之源無迷其途無絕其源終吾身而已矣氣水也言浮物也水大而物之浮者大小畢浮氣之與言猶是也氣盛則言之短長與

聲之高下者皆宜。雖如是其敢自謂幾於成乎。雖幾於成其用於人也奚取焉。雖然待用於人者其肯於器邪。用與舍屬諸人。君子則不然。處心有道。行已方。用則施諸人。舍則傳諸其徒。垂諸文而爲後世法。如是者其亦足樂乎。其無足樂也有志乎古者希矣。志乎古必遺乎今。吾誠樂而悲之。亟稱其人所以勸之。非敢褒其可褒而貶其可貶也。問於愈者多矣。愈生之言不志乎利。聊相爲言之。

答李翊書

凡舉進士者於先進之門何所不往。先進之於後輩苟見其至寧可以不答其意邪。來者則接之舉城士

大夫莫不皆然而愈不幸獨有接後輩名名之所存
誨之所歸也有來問者不敢不以誠答或問爲文宜
何師必謹對曰宜師古聖賢人曰古聖賢人所爲書
具存辭皆不同宜何師必謹對曰師其意不師其辭
又問曰文宜易宜難必謹對曰無難易惟其是爾如
是而已非固開其爲此而禁其爲彼也夫百物朝夕
所見者人皆不注視也及覩其異者則共觀而言之
夫文豈異於是乎漢朝人莫不能爲文獨司馬相如
太史公劉向楊雄爲之最然則用力深者其收名也
遠若皆與世沈浮不自樹立雖不爲當時所怪亦必

無後世之傳也。足下家中百物皆賴而用也。然其所珍愛者必非常物。夫君子之於文，豈異於是乎？若聖人之道，不用文則已，用則必尚其能者。能者非他能，自樹立不因循者是也。有文字來，誰不爲文？然其存於今者，必其能者也。

答劉正夫書

魏文典論稱文以氣爲主，氣之清濁有體，斯言盡之矣。然氣不可以不貫，不貫則雖有英詞麗藻，如編珠綴玉，不得爲金璞之寶矣。鼓氣以勢壯爲美，勢不可以不息，不息則流宕而志返，亦猶絲竹繁奏，必有希聲窈眇聽之者，悅聞如川流迅激，必有迴洑迤邐觀

之者不厭從兄翰常言文章如千兵萬馬風后雨霽
寂無人聲蓋自謂也近世誥命惟蘇廷碩叙事之外
自謂文章才實有餘用之不竭沈休文獨以音韻爲
切重輕爲難語雖甚工旨則未遠夫荆璧不能無瑕
隋珠不能無纇文旨高妙豈以音韻爲病哉此可以
言規矩之內未可以言文外意也較其師友則魏文
與王陳應劉討論之矣江南惟於五言爲妙故休文
長於音韻而謂靈均以來此秘未覩不亦誣人甚矣
古人辭高者蓋以言妙而工適情不取於音韻曹植七哀
詩有徘徊泥諸依四韻王粲詩有舉原安三韻張翊漢
書贊及當時詞賦多用協韻倚數元勳作漢舉作是

也。意盡而止，成篇不拘於隻耦。文選詩有五韻七韻

韻者今之文自四韻六韻以至百韻無有隻者故篇無足曲，詞寡累句。譬諸

音樂，古辭如金石琴瑟，尚於至音。今又如絲竹鞀鼓，

迫於促節，卽知聲律之爲弊也甚矣。世有非文章者，

曰詞不出於風雅，思不越於離騷，摸寫古人何足貴。

也。余曰：譬諸日月，雖終古常見而光景常新。此所以

爲靈物也。余嘗爲文箴，今載於此，曰：文之爲物，自然

靈氣，惚恍而來，不思而至，杼軸得之，澹而無味，琢刻

藻繪，彌不足貴。如彼璞玉，磨礱成器，奢者爲之，錯以

金翠，美質旣彫，良寶斯棄。此爲文之大旨也。文章論

文之爲言難工而可喜易悅而自足世之學者往往溺之一有工焉則曰吾學足矣甚者至棄百事不關于心曰吾文士也職於文而已此其所以至之鮮也昔孔子老而歸魯六經之作數年之頃爾然讀易者如無春秋讀書者如無詩何其用功少而能極其至也聖人之文雖不可及然大抵道勝者文不難而自至也故孟子皇皇不暇著書荀卿蓋亦晚而有作若子雲仲淹方勉焉以模言語此道未足而彊言者也

答吳克秀
才書

夫言止於達意則疑若不文是大不然求物之妙如

繫風捕影能使是物了然於心者蓋千萬人而不一
遇也而况能使之了然於口與手者乎是之謂辭達辭
至於能達則文不可勝用矣揚雄好爲艱深之詞以
文淺易之說若正言之則人人知之矣此正所謂珣
蟲篆刻者其太玄法言皆是物也而獨悔於賦何哉
終身珣蟲而獨變其音節便謂之經可乎屈原作離
騷經蓋風雅之再變者雖與日月爭光可也可以其
似賦而謂之珣蟲乎使賈誼見孔子升堂有餘矣而
乃以賦鄙之至與司馬相如同科雄之陋如此者甚
衆 答謝舉廉

古今能言之士孰不欲雄峙百代之上而垂聲乎百世之下哉然而卒抱奇志而不見泯泯以老死者何其多也豈非才識之不逮故不能成一家之言以至此耳三代之後卓然成一家之言者才十數人而止其餘皆磨滅漸盡則信乎得之於天者非超然而不羣則難乎其以文章自命矣比辱賜書大抵未能達夫雄深雅健之作而務爲浮薄靡麗之文而已此甚不可也僕聞古之爲文者必本於經而根於道其紀志表傳記序銘贊則各有其體而不可以淆焉而莫之辨也至其發言遣辭又奚以剽賊爲工哉今不本

於經不根於道而雜出於百家傳記之說則其立論不自其大而自其細固已自小矣尚何能與古人齊驅並駕哉老蘇之文頓挫曲折蒼然鬱然鏗刻峭厲幾不可與爭鋒然而有識之士猶有譏焉者良以其立論之駁而不能盡合乎聖人之道也今無蘇公之才而立論又下蘇公遠甚則何望其言之立而不仆耶古之用兵其合散進退出奇制勝固神速變化而不可測也至其部伍行陣之法則繩繩乎其弗可以亂爲文而不以法是猶用師而不以律矣古之論文必先體制而後工拙譬諸梓人之作室也其棟梁榱

八
編
卷
之
一
通
志
卷
之
一
揚之任雖不能以大相遠也。而王公大人之居與浮屠老子之廬官司之署庶民之室其制度固懸絕而不相侔也。使記也而與序無異焉。則庶民之室將同於浮屠老子之祠亦可乎。鑄劍而肖於刀且猶不可。事而肖於舟奚可乎。韓子之於文也。惟陳言之務去。今雖全未能如韓子亦宜少刊落矣。乃悉古書奇字而駢集鱗次焉。不幾於天吳紫鳳顛倒短褐也邪。蘇子謂錦綉綺縠服之美者也。然尺寸而割之錯雜而紐之以爲服則綈繒之不若。今先生乃欲集群英以爲華爲卉其亦異於作者之見矣。世有宴人焉。觀

其鄰之富也。日夜攻鑽而剽之。幸而得其貨實財賄。以爲得計矣。一旦徼者獲之。則藹然盜也。今爲文者。至死不悟。且役役焉割裂而綴輯之。則其氣固已藹然矣。又何能渾浩如江河。而有排憂之力哉。

答程伯大論文

凡有關民用及一切彌綸範圍之具。悉囿乎文。非文之外。別有其他也。然而事爲旣著。無以紀載之。則不能以行遠。始託諸辭翰。以昭其文。略舉一二言之。禹敷土。隨山刊木。奠高山大川。旣成功矣。然後筆之爲禹貢之文。周制聘覲燕享餽食昏喪諸禮。其升降揖讓之節。旣行之矣。然後筆之爲儀禮之文。孔子居鄉

黨容色言動之間從容中道門人弟子既習見之矣
然後筆之爲鄉黨之文

文原

書法

古文者黃帝史蒼頡所造也頡首四月通於神明仰
觀奎星圓曲之勢俯察龜文鳥跡之象博采衆美合
而爲字是曰古文孝經援神契云奎主文章蒼頡倣
象是也科斗卽古文別名蒼頡卽古文之祖也

十體書所

大篆者周宣王太史史籀所作也或云柱下史始變
古文或同或異謂之爲篆篆者傳也傳其物理施之

無窮

十體書所

籀文者周太史史籀所作也與古文大篆小異後人以名稱書謂之籀文

十體書斷

小篆者秦始皇丞相李斯所作也增損大篆異同籀文謂之小篆亦曰秦篆天下行之畫如鐵石字若飛動作楷隸之祖

十體書斷

八分者秦羽人上谷王次仲所作也王愔云次仲始以古書方廣少波勢建初中以隸書作楷法字方八分言有模楷始皇時官務煩多得次仲文簡略赴急疾之用甚喜遣使召之三徵不至始皇大怒制檻車送之於道化爲大鳥飛去唯蔡伯喈乃造其極王次

仲卽八分之祖也

十體書斷

隸書者秦下邳人程邈所造也邈字元岑始爲縣吏得罪始皇幽繫雲陽獄中覃思十年損益大小篆方圓而爲隸書三千字奏之始皇善之用爲御史以奏事繁多篆字難成乃用隸字以爲隸人佐書故曰隸書按八分則小篆之捷隸亦八分之捷漢陳遵善隸書與人尺牘人皆藏之以爲榮厥後鍾元常王逸少各造其極程邈卽隸書之祖也

十體書斷

章草者漢皇門令史遊所作也衛恒李誕並云漢初而有草法不知其誰蕭子良云章草者漢齊相杜操

始變隸法非也王愔云漢元帝時史游作急就章解
散隸體粗書之按章艸之書字字區別張芝變爲今
草如水流速拔茅連茹

十體書斷

行書者後漢隸川劉德昇所造也卽正書之小變務
從簡易相間流行故謂之行書王愔云晉世以來工
書者多以行書著名昔鍾元常善行狎書是也厥後
王羲之獻之並造其極焉

十體書斷

飛白者後漢左中郎將蔡邕所作也王隱王愔並云
飛白變楷製也本是宮殿題署勢旣尋丈字宜輕微
不滿名爲飛白八分之輕者雖有此說不言起由按

漢靈帝嘉平年詔蔡邕作聖皇篇篇成詣鴻都門上
時方修飾鴻都門伯喈待詔門下見役人以堊帚成
字心有悅焉歸而爲飛白之書漢末魏初並以題署
宮闕其體有二創法於八分窮微於小篆自非蔡公
設妙豈能詣此

十體書目斷

草書者後漢徵士張伯英之所造也杜度妙於章艸
崔瑗崔寔父子繼能羅暉趙襲亦法此藝襲與張芝
芝相善芝自云上比崔度不足下方羅趙有餘

十體書目斷

蒼頡之初作書蓋依類象形故謂之文其後形聲相
益卽謂之字字者言孳乳而浸多也著於竹帛謂之

書、書者如也。以迄五帝三王之世，改易殊體，封于泰山者七十有二，代靡有同焉。周禮八歲入小學，保氏教國子，先以六書：一曰指事，指事者視而可識，察而可見，上下是也；二曰象形，象形者畫成其物，隨體詰詘，日月是也；三曰形聲，形聲者以事爲名，取譬相成，江河是也；四曰會意，會意者比類合誼，以見指撝，武信是也；五曰轉注，轉注者建類一首，同意相受，考老是也；六曰假借，假借者本無其字，依聲託事，令長是也。及宣王太史籀著大篆十五篇，與古文或異。至孔子書六經，左丘明述春秋傳，皆以古文，其後諸侯力

政不統於王惡禮樂之害已而皆去其典籍分爲七
國出疇異晦車涂異軌律令異法衣冠異制言語異
聲文字異形秦始皇帝初兼天下丞相李斯乃奏同
之罷其不與秦文合者斯作蒼頡篇中車府令趙高
作爰歷篇太史令胡毋敬作博學篇皆取史籀大篆
或頗省改所謂小篆者是時秦燒滅經書滌除舊
典大發隸卒興役戍官獄職務繁初有隸書以趣約
易而古文由此絕矣自爾秦書有八體一曰大篆二
曰小篆三曰刻符四曰蟲書五曰摹印六曰署書七
曰殳書八曰隸書漢興有草書尉律學僮十七已上

始諷籀書九千字乃得爲吏又以八體試之郡移太

史并課最者以爲尚書史書或不正輒舉劾之今雖有尉律不課小學不修莫達其說久矣孝宣時召通
蒼頡讀者張敞從受之涼州刺史杜業沛人爰禮講
學大夫秦近亦能言之孝平時徵禮等百餘人令說
文字未央廷中以禮爲小學元士黃門侍郎楊雄采
以作訓纂篇凡蒼頡已下十四篇凡五千三百四十
字羣書所載略存之矣及莽新居攝使大司空甄豐
等校文書之部自以爲應制作頗改定古文時有六
書一曰古文孔子壁中書也二曰奇字卽古文而異

字終於假
借假入一
何也

者也。三曰篆書，卽小篆。秦始皇帝使下杜人程邈所作也。四曰佐書，卽秦隸書。五曰繆篆，所以摹印也。六曰鳥虫書，所以書幡信也。壁中書者，魯恭王壞孔子宅而得禮記、尚書、春秋、論語、孝經。又北平侯張倉獻春秋左氏傳，郡國亦往往於山川得鼎彝，其銘卽前代之古文，皆自相似。雖叵復見遠流，其詳可得略說也。而世人大共非訾，以爲好奇者也。故詭更正文，卿壁虛造，不可知之書，變亂常行，以耀於世。說文解字序古初制字多象形，故象形爲六書之首，形不可象而指事，事不可指而會意，意不可會而諧聲，聲無可諧。

五不足而後假借

論六書

鍾繇少時隨劉勝往抱犢山學書三年比還與曹操
邯鄲淳韋誕孫子荆關杞把等議用筆法見蔡邕筆
法於韋誕坐上苦求不與及誕死陰令人盜開其墓
以得之故知多力豐筋者聖無力無筋者病一一從
其消息而用之由是更妙繇曰用筆者天也流美者
地也非凡庸所知臨終探囊以授子會曰吾精思學
書學其用筆若與人居畫地廣數步臥畫被穿過表
如廁至於忘歸每見萬類皆畫象之

用筆說

初學先大書不得從小善鑒者不寫善寫者不鑒意

前筆後者勝。意後筆前者敗。

衛夫人筆陣圖說

夫紙者陣也。筆者刀稍也。墨者鎧甲也。水硯者城池也。心意者將帥也。本領者副將也。結構者謀略也。颺筆者吉凶也。出入者號令也。屈折者殺戮也。若欲書先乾研墨。凝神靜慮。預想字形大小。偃仰平直。振動令筋骨相連。意在筆前。然後作字。若平直相似。狀如算子。上下方整。前後齊平。便不是書。但得其點畫耳。昔宋翼嘗作此書。翼師鍾繇叱之翼。三年不敢見潛心改迹。每作一波。嘗三過折筆。每作一點。常隱鋒而瀉之。予少學衛夫人書。將謂大能及渡江北游。各山

見李斯曹喜等書又之許下見鍾繇梁鴻書洛下見
蔡邕石經三體書從兄洽處見張昶華岳碑始知學
衛夫人書徒費年月遂改本師於衆碑學習焉時年
五十有三恐風燭奄及聊遺教於子孫耳可藏之石
室千金勿傳非其人也

題筆陣圖後

米元章采隋唐至本朝得一十四家續之僧智果書
雖氣骨清健大小相襍如十四五貴冑徧性方循繩
墨忽越規矩褚遂良書如馭熟戰馬舉動從人意而
別有一種驕色虞世南如學休糧道士神宇雖清而
體氣疲薳歐陽詢如新瘥病人顏色憔悴舉動辛勤

柳公權如深山道士、修養已成、神氣清健、無一點塵俗、顏真卿如項羽掛甲、樊噲排突、硬弩欲張、鐵柱特立、昂然有不可犯之色、李邕如乍富小民、舉動屈強、禮節生疎、徐浩如蘊德之士、動容溫厚、舉止端正、敦尚名節、體氣純白、沈傳師如龍游天表、虎踞溪傍、神情自若、骨法清虛、周越如輕薄少年、舞劍氣勢雄健、而鋒刃交加、錢易如美丈夫、肌體充悅、神氣清秀、蔡襄如少年女子、訪雲尋雨、體態嬌嬈、行步輕緩、多飾繁華、蘇舜欽如五陵少年、駿馬青衫、醉眠芳草、狂歌翫樂、張友直如官女插花、嬾嬌對鏡、端正自然、別有

一種嬌態

評十四家

余在黔南時甚覺書字綿弱及移戎州見舊書多可憎大槩十字中有三四差可耳今方悟古人沉着痛快之語但難爲知音爾○心能轉腕手能轉筆書字便如人意古人工書無他異但能用筆耳○余嘗評書字中有筆如禪家句中有眼至如右軍如涅槃經說伊字具三眼也此要須人自體會得不可見立論便興譁也○王氏書法以爲如錐畫沙如印印泥蓋言鋒藏筆中意在筆前耳承學之人更用蘭亭永字以開字中眼目能使學家多拘忌成一種俗氣要之

右軍二言羣言之長也。○東坡先生云大字難於結密而無間、小字難於寬綽而有餘、寬綽而有餘如東方朔畫像贊、樂毅論、蘭亭禊事、詩叙、先秦古器、科斗文字、結密而無間、如隹山崩崖、瘞鶴銘、永州磨崖中興頌、李斯鐸山刻、秦始皇及二世皇帝詔、近世兼二美、如楊少師之正書、行艸、徐常侍之小篆、此雖難爲俗者言、要歸畢竟如此、如人眩時、五色無主、及其神澄意定、青黃皂白、亦自燦然、字書時時臨模、可得形似、大要多取古書細看、令入神、乃到妙處、唯用心不雜、迺是入神要路。

書說

有吏奴有
文奴非特
書也

凡書通卽變王變白雲體歐變右軍體柳變歐陽體
永禪師褚遂良顏真卿李邕虞世南等並得書中法
皆后自變其體以傳于世俱得垂名若執法不變縱
能入石三分亦被號爲書奴終非自立之體此書家
大要

終

八編類纂卷之二百七十九

經濟編

文類

聖書

皇帝問太子家令上書言兵體三章聞之書言狂夫
之言而明主擇焉今則不然言者不狂而擇者不明
國之大患故在於此使夫不明而擇於不狂是以萬
聽而萬不當也

漢文帝答鼂錯聖書

皇帝謹問南粵王甚苦心勞思朕高皇帝側室之子
棄外奉北藩於代道里遼遠壅蔽樸愚未嘗致書高

時化乘機
家多事起
悔故須正
苦

八編類纂
卷一百一十九

皇帝棄羣臣孝惠皇帝卽世高后自臨事不幸有疾
日進不衰以故詩暴乎治諸呂爲變故亂法不能獨
制迺取他姓子爲孝惠皇帝嗣賴宗廟之靈功臣之
力誅之已畢朕以王侯吏不釋之故不得不立今卽
位乃者聞王遺將軍隆慮侯書求親昆弟請罷長沙
兩將軍朕以王書罷將軍博陽侯親昆弟在真定者
已遣人存問修治先人冢前者聞王發兵於邊爲寇
災不止當其時長沙苦之南郡尤甚雖王之國庸獨
利乎必多殺士卒傷良將吏寡人之妻孤人之子獨
人父母得一二十朕不忍爲也朕欲定地犬牙相入

此書後世
不以爲篇
而以爲有
休
史事於
史作一
行斷分
是

者以問吏。吏曰：高皇帝所以戒長沙土也。朕不得擅
變焉。吏曰：得王之地，不足以爲大；得王之財，不足以
爲富。服領以南，王自治之。雖然，王之號爲帝，兩帝並
立，亡一乘之使以通其道，是爭也。爭而不讓，仁者不
爲也。願與王分棄前患，終今以來，通使如故。故使賈
馳諭告王朕意。王亦受之，毋爲寇災矣。上褚五十衣，
中褚三十衣，下褚二十衣，遺王。願王聽樂娛憂存問
鄰國。賜南粵王尉佗書

皇帝敬問匈奴大單于無恙。使係虛淺遺朕書云：願
罷兵休士，除前事，復故約，以安邊民。世世平樂，朕甚

嘉之此古聖王之志也漢與匈奴約爲兄弟所以遺
單于甚厚背約離兄弟之親者常在匈奴然右賢王
事已在赦前勿深誅單于若稱書意明告諸吏使無
負約有信敬如單于書使者言單于自將并國有功
甚苦兵事服繡袷綺衣長襦錦袍各一比疎一黃金
筋且帶一黃金犀毗一綉衣匹錦二十四匹赤緋綠緋
各四十匹使中大夫意謂者令肩遺單于 皇帝敬
問匈奴大單于無恙使當戶且渠雕渠難郎中韓遼
遺朕馬二匹已至敬受先帝制長城以北引弓之國
受令單于長城以內冠帶之室朕亦制之使萬民耕

古今集
漢之第一
少會其時
之未可爲
也

織射獵衣食父子母離臣主相安俱無暴虐今聞滌
惡民貪降其趨背義絕約忘萬民之命離兩主之歡
然其事已在前矣書云二國已和親兩主驩說寢兵
休卒養馬世世昌樂翕然更始朕甚嘉之聖者日新
改作更始使老者得息幼者得長各保其首領而終
其天年朕與單于俱由此道順天恤民世世相傳施
之無窮天下莫不成嘉使漢與匈奴鄰敵之國匈奴
處北地寒殺氣早降故詔使遺單于秣金帛綿絮
他物歲有數今天下大安萬民熙熙獨朕與單于爲
之父母朕追念前事薄物細故謀臣計失皆不足以

離昆弟之驩。朕聞天不頗覆地不偏載。朕與單于皆捐細故俱蹈大道也。墮壤前惡以圖長久。使兩國之民若一家子。元元萬民下及魚鼈上及飛鳥。跂行喙息蠕動之類莫不就安利避危殆。故來者不止天之道也。俱去前事。朕釋逃虜民。單于毋言章尼等。朕聞古之帝王約分明而不食言。單于留志天下大安和親之後。漢過不先單于其察之。遺匈奴書二首

昔高皇帝王天下。建立子弟以藩屏社稷。先日諸呂陰謀大逆。劉氏不絕。若髮賴絳侯等誅討賊亂。尊立孝文以安宗廟。非以中外有人表裏相應。故邪樊鄴

曹權携劍摧鋒從高皇帝墾苗除害耘鋤海內當此之時頭如蓬葆勤苦至矣然其賞不過封侯今宗室子孫曾無暴衣露冠之勞裂地而王之分財而賜之父死子繼兄終弟及今王骨肉至親敵吾一體迺與他姓異族謀害社稷親其所疏疏其所親有逆悖之心無忠愛之義如使古人有知當何面目復奉齋酌見高祖之廟乎

昭帝賜燕王旦璽書

寧宗時韓侂胄聞已得泗州及新息褒信潁上虹縣乃議降詔曰天道好還中國有必伸之理人心效順此何語匪夫無不報之仇秦茲醜虜猶託要盟腹生靈之資

奉溪壑之歛此非出於不得已彼乃謂之當然軍入塞而公肆創殘使來庭而敢爲桀驁洎行李之繼遣復嫚詞之見加含垢納污在人情而已極聲罪致討屬胡運之將傾兵出有名師直爲壯言乎遠言乎近孰無忠義之心爲人子爲人臣當念祖宗之憤直學士院李壁之詞也朱欽宗罪已詔

書

燕攻齊取七十餘城唯莒卽墨未下齊田單以卽墨破燕殺騎劫初燕將攻下聊城人或譏之燕將懼誅遂保守聊城不敢歸田單攻之歲餘士卒多死而聊

城不下

乃爲書約之矢以射城中遺燕將曰吾

之智者不倍時而棄利勇士不怯死而賊名忠臣
先身而後君今公行一朝之忿不顧燕王之無臣
非忠也殷身亾聊城而威不信於齊非勇也功廢名
滅後世無稱非智也故智者不再計勇士不怯死今
死生榮辱尊卑貴賤此其一時也願公之詳計而無
與俗同也且楚攻南陽魏攻平陸齊無南面之心以
爲南陽之害不若得濟北之利故定計而堅守之
今秦人下兵魏不敢東面橫秦之勢合則楚國之形
危且棄南陽斷右壤存濟北計必爲之今楚魏交退

燕牧不至齊。無天下之規。與聊城共據。湛岸之敵。即
臣見公之不能得也。齊必決之於聊城。公無再計。彼
燕國大亂。君臣過計。上下迷惑。粟腹以十萬之衆。五
折於外。萬乘之國。被圍於趙。壤削主困。爲天下戮。公
聞之乎。今燕王方寒心。獨立大臣不足恃。國敝旣多。
民心無所歸。今公又以聊城之民。距全齊之兵。常年
不解。是墨翟之守也。食人炊骨。士無反北之心。是孫
臆吳起之兵也。能已見於天下矣。故爲公計。不如罷
兵休士。全車甲。歸報燕王。燕王必喜。士民見公如見
父母。交游攘臂而議於世。功業可明矣。上輔孤主。以

制羣臣下養百姓以資說士矯國華俗於天下功名
可立也意者亦捐燕棄世東游於齊乎請裂地定封
富比陶衛世世稱寡與齊久存此亦一計也二者顯
名厚實也願公孰計而審處一也且吾聞效小節者
不能行大威惡小耻者不能立榮名昔管仲射桓公
中鈎筌也遺公子糾而不能死怯也東縛桎梏辱身
也此三行者鄉里不通也世主不臣也使管仲終窮
抑幽囚而不出慙恥而不見窮年沒壽不免爲辱人
賤行矣然管子并三行之過據齊國之政一匡天下
九合諸侯爲五霸首名高天下光照鄰國曹沫爲魯

君將三戰三北而喪地千里使曹子之足不離陳計不顧後出必死而不生則不免爲敗軍禽將曹子以敗軍禽將非勇也功廢名滅後世無稱非智也故生三北之恥退而與魯君計也曹子以爲遭齊桓公有天下朝諸侯曹子以一劍之任劫桓公於壇位之上顏色不變而辭氣不悖三戰之所喪一朝而反之天下震動驚駭威信吳楚傳名後世若此二公者非不能行小節死小恥也以爲殺身絕世功名不立非智也故去忿恚之心而成終身之名除感忿之耻而立累世之功故業與三王爭流名與天壤相敵也公其

此秦未必知

圖之燕將曰敬聞命矣因罷兵倒輜而去故解齊國之圍救百姓之死仲連之說也

章邯既敗於鉅鹿陳餘遺章邯書曰白起爲秦將南征鄢郢北阬馬服攻城略地不可勝計而竟賜死蒙恬爲秦將北逐戎人開榆中地數千里竟斬陽周何者功多秦不能盡封因以法誅之今將軍爲秦將三歲矣所亡失以十萬數而諸侯並起滋益多彼趙高素諛日久今事急亦恐二世誅之故欲以法誅將軍以塞責使人更代將軍以脫其禍夫將軍居外久多內卻有功亦誅無功亦誅且天之亡秦無愚智皆知

之。今將軍內不能直諫，外爲亡國將，孤特獨立而欲
常存，豈不哀哉！將軍何不還兵與諸侯，爲從約共攻
秦，分王其地，南面稱孤，此孰與身伏鈇質、妻子爲僇
乎？章邯狐疑，陰使候始成，使項羽欲約，約未成，項羽
使蒲將軍日夜引兵渡三戶，軍漳南，與秦戰，再破之。
項羽悉引兵擊秦軍，汙水上大破之。章邯使人見項
羽，欲約。項羽召軍吏謀曰：「糧少，欲聽其約。」軍吏皆曰：「
善。」項羽乃與期洹水南殷虛上。已盟，章邯兄項羽而
流涕爲言。趙高、項羽乃立章邯爲雍王，置楚軍中。
春卿無恙，前別冀南寂無音。驛援間遠，長安因留上。

孟子之論
樂筆綴耳

林竊見四海已定，兆民同情，而季孟閉拒背畔，爲天下表的，常懼海內切齒，思相屠裂，故遺書戀戀，以致惻隱之計。乃聞季孟歸罪於援，而納王游翁詬邪之說，自謂函谷以西舉足可定，以今而觀，竟何如邪？援素知季孟孝愛曾閔，不過夫孝於其親，豈不慈於其子？可有子抱三木而跳梁妄作，自同分羹之事乎？季孟平生自言所以擁兵衆者，欲以保全父母之國，而完墳墓也。又言苟厚士大夫而已，而今所欲全者將破亡之，所欲完者將毀傷之，所欲厚者將反薄之，季孟嘗折愧子陽而不受其爵，今更共陸沉，欲往附之。

將難爲顏乎。若復責以重質，當安從得？子主給是哉。
往時子陽獨欲以王相待，而春卿拒之。今者歸老，更
欲低頭與小兒曹共槽櫪而食，併肩側身於怨家之
朝乎？男兒溺死，何拘游哉！今國家待春卿意深宜，
使牛孺卿與諸耆老大人共說季孟，若計畫不從，真
可引領去矣。前披輿地圖，見天下郡國百有六所，奈
何欲以區區二邦以當諸夏百有四乎？春卿事季孟
外有君臣之義，內有朋友之道。言君臣邪？固當諫爭。
語朋友邪？應有切磋。豈有知其無成而但萎腰咋舌，
叉手從族乎？及今成計殊尚善也。過是欲少味矣。且

來君叔天下信士朝廷重之其意依依常獨爲西州
言援商朝廷尤欲立信於此必不負約援不得久留

願急賜報

馮異與楊廣書

蓋上天垂司過之星聖主建敢諫之鼓設非謬之備
惡箴闕之言何哉凡有所長必有所短也去冬傳有
大計無不悚懼旋知供備貢獻萬夫解惑頃聞建議
復欲追遵前圖卽事之期便有定月益使撫然想是
流妄謬其必爾民何望乎曩日之舉義兵也天下之
士所以響應者董卓擅廢置害太后弘農王略烝官
人發掘園陵暴逆至此故諸州郡雄豪聞聲慕義神

武外振卓遂內殲元惡旣斃幼主東顧俾保傳宣命
欲令諸軍振於河北通謀黑山曹操放毒東徐劉表
稱亂南荆公孫瓚然北幽劉繇決力江滸劉備爭
盟淮隅是以未獲承命橐弓戢戈也今備繇旣破操
等饑餒謂當與天下合謀以誅醜類拾而不圖有自
取之志非海內所望一也昔成湯伐桀稱有夏多罪
武王伐紂曰殷有罪罰重哉此二王者雖有聖德宜
當君世如使不遭其時亦無田興矣幼主非有惡於
天下徒以春秋尚少脅於疆臣若無過而奪之懼未
合於湯武之事二也卓雖狂狡至廢主自與亦猶未

也而天下聞其桀虐攘臂同心而疾之以中土希戰之兵當邊地勁捍之虜所以斯湏游魂也今四方之人皆玩敵而便戰鬪矣可得而勝者以彼亂而我治彼逆而我順也見當世之紛若欲大舉以臨之適足趣禍三也天下神器不可虛于必湏天贊與人力也殷湯有白鳩之祥周武有赤鳥之瑞漢高有星聚之符世祖有神光之徵皆因民困瘁於桀紂之政毒苦於秦莽之役故能芟去無道致成其志今天下非患於幼主未見受命之應驗而欲一旦卒然登卽尊號未之或有四也天子之貴四海之富誰不欲焉義不

可勢不得耳陳勝項籍王莽公孫述之徒皆南而稱
孤莫之能濟帝王之位不可橫冀五也幼主岐疑若
除其偏去其顛必成中興之業夫致主於周成之盛
自受旦奭之美此誠所望於尊明也縱使幼主有他
改異猶望推宗室之譜屬論近親之賢良以紹劉統
以固漢宗皆所以書功金石圖形丹青流慶無窮垂
聲管絃捨而不爲爲其難者想明明之素必所不忍
六也五世爲相權之重勢之盛天下莫得而比爲忠
貞者必曰宜夙夜思惟所以扶國家之躋頤念社稷
之危殆以奉祖考之志以報漢室之恩其忽履道之

節而疆進取之欲者將曰天下之人非家吏則門生也孰不從我四方之敵非吾匹則吾役也誰能違我蓋乘累世之勢起而取之哉二者殊數不可不詳察士也所貴於聖哲者以其察於機宜慎於舉措若難圖之事難保之勢以激群敵之氣以生衆人之心公義固不可私計又不利明哲不處八也世人多惑於圖緯而牽引非類比合文字以悅所事苟以阿上惑衆終有後悔者自往迄今未嘗無之不可不深擇而熟思九也九者尊明所見之餘耳庶備起予補所遺忘忠言逆耳幸留神聽

孫策責袁術書

石勒被驚亦
出孫中斜
錄者

石勒被驚平原與母王相失至是劉琨遣張儒送王
于勒遺勒書曰將軍發跡河朔席卷兗豫飲馬江淮
折衝漢沔雖自古名將未足爲喻所以攻城而不有
其人略地而不有其土翕爾雲合忽復星散將軍豈
知其然哉存亡決在得主成敗要在所附得主則爲
義兵附逆則爲賊衆義兵雖敗而功業必成賊衆雖
剋而終歸殄滅昔赤眉黃巾橫逆宇宙所以一旦敗
亡者正以兵出無名聚而爲亂將軍以天挺之質威
振宇內擇有德而推崇隨時望而歸附勲義堂堂長
享遐貴背聽則禍除向主則福至採納往誨翻然改

齒天下不足定螳寇不足掃今相授侍中持節車騎
大將軍領護匈奴中郎將襄城郡公總內外之任兼
華戎之號顯封大郡以表殊能將軍其受之副遠近
之望也自古以來誠無戎人而爲帝王者至於名臣
建功業者則有之矣今之遲想蓋以天下大亂當須
雄才遙聞將軍攻城野戰合於機神雖不視兵書關
與孫吳同契所謂生而知之者上學而知之者次但
得精騎五千以將軍之才何向不摧至心實事皆張
儒所具勒報現日事功殊途非腐儒所聞君當遲節
本朝吾自夷難爲效

簡快有西
漢風大都
魏晉以來
冗冗不足
觀者書記
也

唐李淵以書招李密密自恃兵疆欲自爲盟主復書
曰所望左提右挈戮力同心執子嬰于咸陽殪商辛
于牧野淵得書笑曰密妄自尊大非折簡可致吾方
有事關中若遽絕之乃是更生一敵不如卑辭推獎
以驕其志使爲我塞成臯之道綴東都之兵我得專
意西征俟關中平定據險養威徐觀鵲蚌之勢以收
漁人之功未爲晚也乃復書曰天生蒸民必有司牧
當今司牧非子而誰老夫年邁知命頗不及此欣戴
大弟攀鱗附翼惟弟蚤膺圖錄以寧兆民宗盟之長
屬籍見容復封於唐斯榮足矣密得書甚喜以示將

佐曰唐公見推天下不足定矣自是信使不絕

將軍勇冠三軍才爲世出棄鸞雀之小志慕鴻鵠以
高翔昔因機變化遭遇明主立功立事開國稱孤朱
輪華轂擁旄萬里何其壯也如何一旦爲奔亡之虞
聞鳴鏑而股戰對穹廬以屈膝又何劣邪尋君去就
之際非有他故直以不能內審諸已外受流言沈迷
倡厥以至於此聖朝赦罪責功棄瑕錄用推赤心於
天下安反側於萬物將軍之所知不假僕一二談也
朱鮪涉血于友于張繡剗刃於愛子漢王不以爲疑
魏君待之若舊况將軍無昔人之罪而勲重於當世

將軍魚游於沸鼎之中，鷙巢於飛幕之上，不亦惑乎？
暮春三月，江南草長，雜花生樹，羣鶯亂飛，見故國之
旗鼓，感生平於疇日，撫絃登陣，豈不愴恨？所以廉公
之思趙將，吳子之泣西河，人之情也。將軍獨無情哉？
想早勵良規，自求多福。當今皇帝盛明，天下安樂，白
環西獻，楛矢東來，夜浪滇池，解辯請職，朝鮮昌海，蹶
角受化，唯北狄野心，崛強沙塞之間，欲延歲月之命
耳。中軍臨川，殿下明德茂親，總茲戎重，弔民洛汭，伐
罪秦中，若遂不改，方思僕言。聊布往懷，君其詳之。
伯之書

希範與陳

先大王歸嚮朝廷心如金石我真宗皇帝命爲同姓待以骨肉之親封爲夏王履此山河之大旌旗車服降天子一等恩信隆厚始終如一齊桓晉文之盛無以過此朝聘之使往來如家牛馬馳羊之產金銀綿帛之貨交受其利不可勝紀塞垣之下逾三十年有耕無戰禾黍雲合甲冑塵委養生葬歿各終天年使蕃漢之民爲堯舜之俗此真宗皇帝之至化亦先大王之大功也自先大王薨皆倉皇震悼累日嚶吁遣使行奠賻之禮以大王嗣守其國爵命崇重一如先大王昨者大王以本國衆多之情推立大位誠不獲

讓理有未安而遣行人告乎天子、又遣行人歸其旌節、朝廷中外莫不驚憤、肅收行人戮於都市、皇帝詔曰、非不能以四海之力支其一方、念先帝歲寒之奉意、故夏王忠順之大功、豈一朝之失而驟絕之、乃不殺而遠假有本國諸蕃之長抗禮於大王、而能含容之、若此乎、省初念終、天子何負於大王哉、二年以來疆事紛起、耕者廢耒、織者廢杼、邊界蕭然、豈獨漢民之勞邪、使戰守之人日夜豺虎、競爲吞噬、虎傷相枕、哭泣相聞、仁人爲之流涕、智士爲之扼腕、天子遣使淹經度西事、而命之曰、有征無戰、不殺無辜、王者之

兵也汝往欽哉仲淹拜手稽首敢不夙夜于懷至邊
之日見諸將帥多務小功不爲大略甚未副天子之
意仲淹與大王雖未嘗高會嚮者同事朝廷於天子
則父母也於大王則兄弟也豈有孝於父母而欲害
於兄弟哉可不爲大王一二而陳之傳曰名不正則
言不順言不順則事不成大王世居西土衣冠語言
皆從本國之俗何獨名稱與中朝天子侔擬名豈正
而言豈順乎如衆情莫奪亦有漢唐故事單于可汗
皆本國極尊之稱具在方冊仲淹料大王必以契丹
爲比故自謂可行且契丹自石晉朝有援立之功時

已稱帝。今大王世受天子建國封王之恩，如諸蕃中有叛朝廷者，大王當爲霸主，率諸侯以伐之。則世世有功，王王不絕，乃欲擬堯舜之稱，究其體勢，昭然不同。徒使瘡痍萬民，拒朝廷之禮，傷天地之仁。易曰：天地之大德曰生，聖人之大寶曰位，何以守位？曰：仁。是以天地養萬物，故其道不窮；聖人養萬民，故其位不傾。又傳曰：國家以仁獲之，以仁守之者，百世。昔在唐末，天下恟恟，羣雄咆哮，日尋干戈，血我生靈，腥我天地，滅我禮樂，絕我稼穡。皇天震怒，討其不仁。五代王侯覆亡，相續。老氏曰：樂殺人者，不可如志於天下。誠

不誣矣。後唐顯宗祈于上天曰：願早生聖人，以救天下。是年我太祖皇帝應祈而生。及歷試諸難，中外析戴，不血一刃，受禪于周。廣南、江南、荆湖、西川有九江萬里之阻，一舉而下，豈非應天順人之至乎？由是罷諸侯之兵，革五伐之暴，垂八十年，天下無禍亂之憂。太宗皇帝聖文神武，表正萬邦，吳越約疆，并音就縛。真宗皇帝奉天體道，清淨無爲，與契丹通好，受先大王貢禮。自茲四海熙然同春，今皇帝坐朝至晏，從諫如流，有忤雷霆，雖死必赦，故四海之心望如父母。此所謂以仁獲之，以仁守之，百世之朝也。仲淹料大王

建議之初、人有離間妄言、邊城無備、士心不齊、長驅而來、所嚮必下、今以彊人猛馬、奔衝漢地、二年于茲、漢之兵民、蓋有血戰而死者、無一城一將、願歸大王者、此可見聖宋仁及天下、邦本不搖之驗也、與夫問者之說、無乃異乎、今天下久平、人人泰然、不習戰鬪、不熟紀律、劉平之徒、忠敢而進、不顧衆寡、自取其困、餘則或勝或負、殺傷俱多、大王國人、必以獲劉平爲賀、昔鄭人侵蔡、獲司馬公子燮、鄭人皆喜、惟子產曰、小國無文德、而有武功、禍莫大焉、而後鄭國之禍、皆如子產之言、今邊上訓練漸精、恩威已立、有功必賞、

敗事必誅將師而下大知紀律莫不各思奮力效命
爭議進兵如其不然何時可了今招討司統兵四十
萬約五路入界著其律曰生降者賞殺降者斬獲精
彊者賞害老幼婦女者斬遇堅必戰遇險必奔可取
則取可城則城縱未能入賀蘭之居彼之兵民降者
歿者所失多矣是大王自禍其民官軍之勢不獲而
已也仲淹又念皇帝有征無戰不殺非辜之訓夙夜
下懷雖師帥之行君命有所不受奈何鋒刃之交相
傷必衆且蕃兵戰歿者非有罪也忠于大王耳漢民
戰歿非有罪也忠于天子耳使忠孝之人肝腦塗地

積累怨魄爲妖爲災大王其可忽諸朝廷以王者無
外有生之民皆爲赤子何蕃漢之限哉柯勝負之有
哉仲淹與招討太尉夏公經略密學韓公嘗議其事
莫若通問於大王計而決之重人命也其美利甚衆
大王如能以愛民爲意禮下朝廷復其王爵承先大
王之志天下孰不稱其賢哉一也如衆多之情王讓
不獲前所謂漢唐故事如單于可汗之稱尚有可稽
於本國語言爲便復不失其尊大二也但臣貢上國
存中外之體不召天下之怨不速天下之兵使蕃漢
邊人復見康樂無死傷相枕哭泣相開之醜三也又

大王之國府用或闕、朝廷每歲必有銀帛之厚賜爲
大王助、四也、又從來入貢使人止稱蕃吏之職、以避
中朝之尊、按漢諸侯王相皆出真拜、又吳越王錢氏
有承制補官故事、功高者受朝廷之命、亦足隆大王
之體、五也、昨有邊臣上言、乞招致番部首領、仲淹亦
已請罷、大王告諭諸蕃首領、不須去父母之邦、但回
意中朝、則太平之樂、遐邇同之、六也、國家以四海之
廣、豈無遺才、有在大王之國者、朝廷不戮其家、安全
如故、互善事主、以報國士之知、惟同心嚮順、自不失
其富貴、而宗族之人、必更憂恤、七也、又馬牛馳羊之

產金銀繒帛之貨、有無交易、各得其所、八也、大王從之、則上下同其美利、生民之患、幾乎息矣、不從、則上下失其美利、生民之患、何時而息哉、仲淹今日之言、非獨利於大王、蓋以奉君親之訓、救生民之患、合天地之仁而已乎、惟大王擇焉、

宋范仲淹答趙元昊書

八編類纂